

SIARAN BERITA

MyCC Melancarkan Dua Buku Mengenai Tipuan Bida: “Garis Panduan Menentang Tipuan Bida Dalam Perolehan Awam” dan “*Help Us Detect Bid Rigging*”

KOTA KINABALU, 25 September 2014 –“Perolehan awam merupakan kegiatan Kerajaan yang penting dan boleh memberi kesan kepada ekonomi negara maka penerapan langkah pencegahan dalam proses perangkaan tender adalah amat mustahak selain daripada mengetahui langkah mengesan tipuan bida,” kata Dato' Sri Hasan Malek, Menteri Perdagangan Dalam Negeri, Koperasi dan Kepenggunaan (KPDNKK) semasa pelancaran dua buku: “Garis Panduan Menentang Tipuan Bida dalam Perolehan Awam” dan “*Help Us Detect Bid Rigging*” oleh Suruhanjaya Persaingan Malaysia (MyCC) hari ini.

Tipuan bida merupakan larangan dibawah Seksyen 4(2)(d) Akta Persaingan 2010 yang dikuatkuasakan oleh MyCC dan perusahaan yang didapati bersalah boleh di denda sehingga 10 peratus daripada nilai pusingan sedunia perusahaan tersebut. Amalan tipuan bida oleh petender-petender semasa prosedur perolehan awam merupakan ancaman besar untuk institusi awam, terutamanya berhubung pelaburan-pelaburan kos intensif dan dari segi teknologi dan projek-projek. Pendekatan yang proaktif oleh badan-badan perolehan untuk mengesan dan menghalang manipulasi tipuan bida boleh membawa kepada peningkatan dalam penjimatan sejurusnya meningkatkan belanjawan dan reputasi sektor awam.

“Di Malaysia perolehan awam adalah amat penting untuk bukan sahaja memenuhi keperluan seharian, tetapi juga untuk mencapai objektif sosio-ekonomi serta menggalakkan pertumbuhan ekonomi negara. Laporan-laporan ekonomi Malaysia menunjukkan perbelanjaan untuk perolehan sepanjang sepuluh tahun lepas berada di lingkungan 24 sehingga 33 peratus daripada jumlah Keluaran Dalam Negara Kasar (KDNK) dan peratusan ini dilihat sebagai jumlah yang tinggi jika dibandingkan dengan kebanyakan negara OECD lain,” menurut beliau.

Kajian oleh *Organisation of Economic Co-operation and Development* (OECD) menunjukkan perolehan kerajaan sesebuah negara merupakan sebahagian besar dari ekonomi negara dengan 10 hingga 15 peratus peruntukan dari belanjawan negara di

negara maju dan sehingga 20 peratus di negara membangun.

Sebelum ini, pelancaran kedua-dua buku tersebut telah diadakan oleh MyCC di Kuala Lumpur pada bulan Jun. Pelancaran serta seminar tipuan bida di Kota Kinabalu hari ini merupakan antara langkah advokasi berterusan MyCC di seluruh negara.

Menurut Pengerusi MyCC, Tan Sri Dato' Sri Siti Norma Yaakob, untuk mencegah tipuan bida dengan lebih cekap, kerjasama antara penguatkuasa berkenaan dan badan perolehan adalah amat perlu. Oleh itu pihak MyCC turut menjalankan usaha berterusan untuk memeteraikan kerjasama strategik dengan Kementerian Kewangan Malaysia (KKM), Suruhanjaya Pencegahan Rasuah Malaysia (SPRM), dan Jabatan Audit Negara (JAN) supaya boleh memupuk persefahaman yang lebih baik dan usahasama dalam memerangi isu tipuan bida pada peringkat kebangsaan.

Turut hadir di majlis pelancaran adalah Timbalan Ketua Setiausaha KPDNKK, Dato' Azmi bin Lateh, Ketua Pegawai Eksekutif MyCC, Shila Dorai Raj dan Pengarah KPDNKK Sabah, Severinus Tukah.

Seminar mengenai tipuan bida pada hari ini dihadiri lebih kurang 150 pegawai-pegawai perolehan awam dari pelbagai agensi Kerajaan. MyCC telah menganjurkan seminar tipuan bida di Kangar, Sibu dan Sandakan berikutan dengan pelancaran pertama buku-buku tipuan bida tersebut di Kuala Lumpur sebelum ini. Secara keseluruhannya, MyCC telah menjalankan 19 program advokasi di seluruh negara tahun ini.

Buku "Garis Panduan Menentang Tipuan Bida dalam Perolehan Awam" pada asalnya merupakan penerbitan OECD yang telah diterjemahkan oleh MyCC ke dalam Bahasa Malaysia. Buku "*Help Us Detect Bid Rigging*" terbitan MyCC juga boleh didapati dalam versi Bahasa Malaysia.

Kedua-dua penerbitan boleh dimuat turun secara percuma dari laman web MyCC, www.mycc.gov.my. Sebarang pertanyaan mengenai program advokasi boleh diemelkan kepada spiad@mycc.gov.my.

---tamat---

Untuk pertanyaan media, sila hubungi:

Rowena Wong, Tel +603 2273 2277 (ext 111), Email: rowena@mycc.gov.my

Anis Syafiqah, Tel +603 2273 2277 (ext 212), Email: anis@mycc.gov.my

Unit Komunikasi Korporat, Suruhanjaya Persaingan Malaysia (MyCC)

Suruhanjaya Persaingan Malaysia (MyCC)

Ditubuhkan pada Jun 2011, MyCC ialah satu badan bebas bertanggungjawab untuk menguatkuasakan Akta Persaingan 2010, yang dilaksanakan untuk menggalakkan persaingan sihat yang seterusnya akan merangsang produktiviti dan inovasi, lantas mewujudkan pilihan produk atau servis yang lebih banyak kepada pengguna dan kualiti yang lebih baik pada harga yang berpatutan.

Akta ini digunapakai kepada semua aktiviti komersil yang ditanggung didalam dan diluar Malaysia yang boleh menjejaskan persaingan di pasaran Malaysia. Ia memberikan satu rangka kerja kawal termasuk kuasa menyiasat, menghakimi dan mengenakan penalti-penalti kepada pesalah undang-undang persaingan.

Untuk maklumat lanjut tentang Akta Persaingan 2010 dan MyCC, sila rujuk laman web www.mycc.gov.my.